



Memoria xustificativa do convenio de colaboración entre a entidade pública empresarial Augas de Galicia e o Concello de Boiro para a xestión e explotación da rede en alta de abastecemento á marxe dereita da Ría de Arousa

1. Antecedentes

A entidade pública Augas de Galicia, entidade creada pola Lei 9/2010, do 4 de novembro, de augas de Galicia e regulada polo Decreto 32/2012, do 12 de xaneiro, polo que se aproba o seu estatuto, é unha entidade pública empresarial do sector público autonómico de Galicia, adscrita á Consellería de Infraestruturas e Mobilidade, con personalidade xurídica propia e plena capacidade de obrar para o cumprimento dos seus fins.

A entidade pública empresarial Augas de Galicia subrogouse en todos os dereitos e obrigas do organismo autónomo Augas de Galicia e da Empresa Pública de Obras e Servizos Hidráulicos, segundo a Disposición Adicional Primeira do Decreto 32/2012, do 12 de xaneiro, polo que se aproba o Estatuto da entidade pública empresarial Augas de Galicia. Neste sentido todas as referencias contidas no texto deste convenio referidas a empresa pública de Obras e Servizos Hidráulicos (EPOSH) deben entenderse referidas á entidade pública empresarial Augas de Galicia.

A Xunta de Galicia, a través do extinto organismo autónomo Augas de Galicia e da extinta EPOSH, realizou as obras de toma de auga do río Ulla, depuración e tratamento dela; e rede básica en alta para o abastecemento de auga potable aos concellos de Padrón, Dodro, Pontecesures, Valga, Catoira, Rianxo, Boiro, A Pobra do Caramiñal e Ribeira, poñéndooas en funcionamento.

As devanditas actuacións forman parte da obra denominada "Rede Xeral de Abastecemento á Marxe Dereita da Ría de Arousa", que se executou en catro fases.

O 15.10.2004 formalizouse o convenio de colaboración entre a extinta Empresa pública de Obras e Servizos Hidráulicos (EPOSH) e o Concello de Boiro para a xestión e explotación da rede en alta de abastecemento á marxe dereita da Ría de Arousa.

A través deste convenio a extinta EPOSH asumiu a xestión e prestación do servizo de abastecemento de auga potable ao Concello de Boiro e o compromiso de manter e conservar as instalacións que conforman o sistema de abastecemento e que se detallan no convenio; e o Concello de Boiro obrigouse ao pagamento á EPOSH das tarifas establecidas no convenio para sufragar o custe da xestión deste servizo.

Para xestionar e prestar o servizo de abastecemento de auga potable ao Concello de Boiro, entre outros, a extinta EPOSH formalizou o 31.05.2005, logo da correspondente licitación pública, un contrato de xestión de servizo público en réxime concesional da "Explotación das instalacións da rede de abastecemento en alta da marxe dereita da ría de Arousa (A Coruña)", de clave OH.215.634/XSP, cun prazo de vixencia que remata o 30.06.2030. No dito contrato a EPOSH obrígase a pagar unha determinada tarifa ao contratista en función





dos m³ de auga subministrada aos distintos usuarios e determinase que a tarifa actualizárase anualmente de conformidade co previsto nos pregos que rexeron a citada licitación.

As partes consideran necesario formalizar un novo convenio de colaboración, que deixe sen efecto o subscrito en 2004.

2. Obxectivos que se pretenden

O obxecto deste convenio é establecer o novo marco convencional das condicións básicas para a colaboración entre Augas de Galicia e o Concello de Boiro que permita actuar de xeito coordinado e en colaboración na xestión e prestación do servizo de abastecemento de auga potable ao Concello de Boiro, para a óptima xestión do dito servizo.

Con dito fin, prevese que o convenio entre en vigor o día da súa sinatura, producindo efectos económicos dende o día 02.10.2020 e estenderá a súa vixencia durante 4 anos desde esa data, isto é ata o 02.10.2024, prorrogables por 4 anos máis; e, así mesmo acordan que desde a entrada en vigor deste convenio quede sen efecto o subscrito o 15.10.2004.

3. Necesidade da colaboración, razóns de oportunidade e xustificación da non concorrencia

As partes consideran necesario subscribir un novo convenio de colaboración, que deixe sen efecto o formalizado o 15.10.2004, para adaptalo a nova regulación en materia de convenios que establece a Lei 40/2015, do 1 de outubro, de Réxime xurídico do sector público.

A Lei 7/1985, do 2 de abril, reguladora das Bases do Réxime Local, no seu artigo 25.1, e a Lei 5/1997, do 22 de xullo, da Administración local de Galicia no seu artigo 80 recollen que os concellos poden promover toda clase de actividades e prestar cantos servizos públicos contribúan a satisfacer as necesidades e aspiracións da comunidade veciñal. Xunto a esta declaración xeral de competencias estas leis enumeran determinadas materias respecto ás cales os concellos deben ostentar competencias e, entre outras, a protección do medio ambiente e o subministro de augas, cualificando o abastecemento domiciliario de auga potable como servizo de prestación obrigatoria para tódolos concellos. De conformidade co exposto, o servizo público de abastecemento de auga potable é un servizo público reservado legalmente á competencia dos entes locais.

Por outra banda, o artigo 57 da Lei de bases do réxime local e o artigo 194 da Lei da Administración local de Galicia determinan que a cooperación económica, técnica e administrativa entre a Administración Local e as Administracións do Estado e das Comunidades Autónomas, tanto en servizos locais como en asuntos de interese común, desenvólvese con carácter voluntario, baixo as formas e nos termos previstos nas leis, podendo ter lugar, en todo caso, mediante os convenios administrativos que subscriban.

Pola súa parte, para unha prestación máis eficiente do servizo de abastecemento de auga, Augas de Galicia ten subscrito un contrato de xestión de servizo público en réxime concesional da "Explotación das instalacións da rede de abastecemento en alta da marxe dereita da ría de Arousa (A Coruña)", clave OH.215.634/XSP, cun prazo de vixencia que remata o 30.06.2030.





Polo exposto, estímase xustificada a utilización do instrumento do convenio para articular a colaboración de referencia, quedando o devandito convenio fora do ámbito de aplicación da Lei 9/2017, de 8 de novembro, de contratos do sector público, de acordo co establecido no artigo 6 da antedita lei.

4. Estimación de custos e financiamento

O concello de Boiro obrígase a sufragar o custe da xestión do servizo de subministro de auga potable en alta mediante o abono da correspondente tarifa .

A tarifa ascende a $T = 0,1885233 \text{ €/m}^3$ (sen IVE). Aboarase mensualmente, o seu importe será o resultado de multiplicar o valor da tarifa polo número de m³ consumidos no mes inmediatamente anterior.

A tarifa actualizarase anualmente, no mes de xullo, comezando a aplicarse o mes de xaneiro do exercicio seguinte, na mesma proporción de actualización que a tarifa do contrato OH.215.634/XSP citado no apartado primeiro e terceiro desta memoria. Tamén prevese o a modificación da tarifa cando se vexa afectado o equilibrio económico financeiro segundo o establecido na súa cláusula cuarta.

A estrutura das cláusulas deste convenio é a seguinte: *Primeira.- Obxecto; Segunda.- Prestación do servizo; Terceira.- Retribución do servizo; Cuarta.- Equilibrio económico do convenio; Quinta.- Competencia municipal; Sexta.- Vixencia; Sétima.- Comisión de seguimento; Oitava.- Natureza do convenio; Novena.- Modificación do convenio; Décima.-Extinción do convenio; Undécima: Protección de datos de carácter persoal; Duodécima.- Publicidade.*

Para a tramitación deste convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela
A directora de Augas de Galicia
Teresa María Gutiérrez López
(asinado dixitalmente)

